



**Sumáriu Kazu  
Tribunál Distritál Suai  
Maiu 2022**

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

**JSMP** kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Distritál Suai**

**1. Totál kazu ne'ebé JSMP monitoriza:30**

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade fizika simples ho natureza violénsia doméstika (artigu 2 kona-ba konseitu violensia domestika, artigu 3 kona-ba relasaun familia, artigu 35 kona-ba tipu krime violensia domestika no 36 kona-ba krime sira violénsia doméstika nian hanesan krime publiku)	10
Artigu 172 KP	Koasaun seksuál no Violasaun seksuál	1
Artigu 138 KP no Artigu 138 KP no 23,24 tentativa	Omisídiu simples no tentativa omisídiu simples	1
Artigu 172 KP no artigu 23,24 KP	Tentativa violasaun seksuál	1
Artigu 171 KP	Koasaun seksuál	1
Artigu 145 KP	Ofensa ba integridade fizika simples	4
Artigu 145 KP no Artigu 2 no artigu 20. Lei nú. 5/2017, Arma branka.	Ofensa integridade fizika simples no arma brankas	1
Artigu 178 KP	Aktu seksuál ho adoloxente	1
Artigu 139 KP no artigu 2 nú.1, al.b), no artigu 20 nú.1. Lei nú.5/2017. Arma branka.	Omisídiu agravadu no arma brankas	1

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275

Telefone: 3323883 | 77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

Artigu 172 KP no artigu 173 KP no Artigu 2,3, 35 Lei Kontra Violéncia Doméstika (LKVD)	Violasaun seksuál agravante ho natureza violéncia doméstika (artigu 2 kona-ba konseitu violéncia doméstika, artigu 3 kona-ba relasaun familia, artigu 35 kona-ba tipu krime violéncia doméstika no 36 kona-ba krime sira violéncia doméstika nian hanesan krime publiku)	1
Artigu 181 KP	Ezibisionismu seksuál	1
Artigu 292 KP	Korrupsaun pasiva ba aktu ilisitu	1
Artigu 177 KP	Abuzu seksuál ba menór no devisa	1
Artigu 244 KP	Dezobidensia	1
Artigu 258 KP	Danu simples	1
Artigu 172 KP	Violasaun seksuál	1
Artigu 1757, 1758, 1759, 1762, 1765, 1786, 1782, 1804, 1805 KS	Ezersísiu Podér paternál	1

## 2. Totál desizaun ne'ebé JSMP monitoriza:16

Tipu pena	Artigu	Númeru
Suspensaun ba prizaun nia ezekusaun	Artigu 68 KP	6
Pena prizaun no pena multa	Artigu 66 KP no artigu 67 KP	1
Omologa, suspensaun ba pena prizaun nia ezekusaun no absolve	Artigu 262 KPP Artigu 68 KP	1
Omologa	Artigu 262 KPP	8
absolve		2
Total		18

## 3. Totál kazu sira ne'ebé adia tuir JSMP nia monitorizasaun:0

## 4. Totál kazu sira ne'ebé sei kontinua tuir JSMP nia monitorizasaun : 12

### B. Deskrisaun sumáriu julgamentu ba desizaun kazu sira:

#### 1. Ofensa Integridade física simples no Arma Brankas

Nú. Prosesu : 0004/18. MFFBL  
Kompostu tribunal : Koletivu  
Juiz : Dr. Benjamin Barros, Dr. Jose Maria de Araujo no Dra. Patricia de Araújo Fatima Barreto Magno Xavier.  
Prokuradór : Dr. Rafael Jerónimo Gusmão  
Defeza : Dr. Domingos dos Santos  
Desizaun : Omologa dezistencia keixa, pena prizaun tinan 2 suspende ba tinan 2 no absolve

Iha 04 Maiu 2022, Tribunál Distritál Suai, prizide julgamentu tentativa konsiliaun ba krime ofensa ba integridade física simples no leitura akordaun ba krime Armas Brankas, envolve

arguidu Julio da Costa, Tomas dos Reis, Abilio Quintão ho Reinardo da Costa hasoru lezadu Luis Alves no Raul da Silva, iha Munisípiu Manufahe.

### **Akuzasaun prokuradór**

Prokuradór akuza katak iha 02 Agostu 2018, haleu oras tuku 08:20 dader-san, lezadu Luis Alves hamutuk ho Boni no Raul fila husi merkadu no la'õ liu husi arguidu sira nia oin derepente arguidu Julio lori katana hamutuk ho arguidu Tomas, Abilio ho Reinardo la'õ tuir lezadu sira, no toman lezadu sira arguidu Julio tuku dala ida iha lezadu Luis Alves nia kanuruk, tebe tan dala ida iha kotuk laran no buti lezadu nia kakorok, alende ida ne'e arguidu Tomas, Reinaldo no Abilio mós mai tuku tebe lisuk lezadu Luis nia kabun, kotuk laran no ulun rezulta lezadu Luis moras no bubu iha kotuk laran, tuir mai arguidu Julio lori katana atu taa lezadu Luis, maibé lezadu Raul salva lezadu Luis, derepente arguidu Tomas husi sorin tebe kedan dala ida iha lezadu Raul nia kabun rejulta lezadu monu ba rai, hafoin ne'e Sr. Bendito halai mai hadau tiha katana husi arguidu Julio nia liman.

Prokuradór akuza arguidu sira kontra artigu 145 KP kona-ba ofensa ba integridade física simples ho moldura penál tinan 3 ka multa konjuga artigu 2 (b), nú. 2 no artigu 20 hosi Lei nú. 5/2017 kona-ba arma brankas.

Antes tama ba produsaun ba prova bazeia ba artigu 262 Kódigu Prosesu Penál kona-ba tentativa konsiliaun, tribunál halo tentativa konsiliaun ba arguidu sira no lezadu sira relasiona ho krime ofensa ba integridade física simples tanba kazu ne'e klasifika nu'udar krime semi-públiku no nia prosedimentu depende ba keixa. Iha prosesu konsiliaun ne'e, arguidu sira ho lezadu sira deklara katak sira konkorda malu ona katak arguidu sira husu ona deskupa ba lezadu sira. Ho nune'e, lezadu sira hakarak deziste nia keixa hasoru arguidu sira relasiona ho krime ofensa ba integridade física simples. Bazeia ba konkordánsia husi parte rua ne'e, tribunál omologa tiha krime ofensa ba integridade física simples. Enkuantu kona-ba krime arma brankas, tribunál kontinua ba prosesu julgamentu.

### **Produsaun ba prova sira**

Iha prosesu julgamentu arguidu sira konfesa parsialmente ba faktu sira iha akuzasaun, arguidu sira deklara katak tuku duni dala ida iha lezadu Luis Alves nia kanuruk, tebe dala ida iha kotuk laran no buti lezadu nia kakorok, arguidu sira deklara liu tan katak tebe dala ida iha lezadu Tomas dos Reis nia kabun, arguidu sira rejeita sira la lori katana ameasa lezadu sira.

Entretantu lezadu Luis Alves konfirma faktu sira iha akuzasaun no deklara katak arguidu Julio lori katana atu taa lezadu maibé lezadu Raul salva lezadu Luis, tuir mai arguidu Tomas tebe iha lezadu Raul nia kabun rezulta monu ba rai no testemuña Bendito ba hadau tiha katana husi arguidu Julio nia liman.

Alende ne'e lezadu Raul da Silva mós kontinua konfirma faktu sira iha akuzasaun no deklara katak arguidu Julio da Costa lori katana atu taa lezadu Luis maka lezadu Raul salva lezadu Luis nunne'e arguidu Tomas tebe kedas iha lezadu Raul nia kabun rezulta monu no testemuña Bendito ba hadau kedas katana husi arguidu Julio nia liman.

Testemuña Bendito da Costa nu'udar lezadu sira nia kolega haktuir katak momentu akontesimentu ne'e haree arguidu sira tebe baku lisuk lezadu sira, testemuña haktuir katak arguidu Julio kaer katana no atu taa ba lezadu Luis, maibé lezadu Raul halai mai salva lezadu Luis no, arguidu Tomas husi sorin tebe kedan dala ida lezadu Raul nia kabun no monu ba rai. Testemuña haktuir liu tan katak testemuña rasik halai ba hadau katana husi arguidu Julio nia liman.

## **Alegasaun finál**

Prokuradór konsidera arguidu Juilio da Costa provadu komete krime arma branka hasoru lezadu Luis Alves, bazeia ba deklarasaun lezadu sira ne'ebé konfirma faktu iha akuzasaun no sasin mós depoimenta katak arguidu Julio lori katana atu taa lezadu Luis. Tanba ne'e husu ba tribunál atu kondena arguidu tuir artigu ne'ebé prokuradór akuza. Alende ba arguidu Tomas dos Reis, Abilio Quintão ho Reinardo da Costa, prokuradór husu ba tribunál atu fo justisa.

Entretantu defeza mós haktuir katak bazeia ba deklarasaun arguidu sira nian no lezadu ho testemuña nia depoimentu, arguidu nain tolu Tomas dos Reis, Abilio Quintão ho Reinardo da Costa la prienxe rekeztus ba krime arma brankas no husu ba tribunál atu absolve arguidu nain tolu , enkuantu ba arguidu Julio da Costa defeza husu ba tribunál atu fó pena suspensaun.

## **Desizaun**

Depoizde avalia faktu hotu, tribunál prova katak arguidu Julio da Costa lori katana hodi ameasa atu taa lezadu Luis Alves. Bazeia ba faktu provadu tetu mós sirkuntansia atenuante hanesan arguidu foin primeiravéz mai hatan iha tribunál, nune'e tribunál konklui prosesu no kodena arguidu ba pena prizaun tinan rua suspende ba tinan rua, entretantu ba arguidu nain tolu seluk absolve tanba arguidu sira momentu ne'eba la kaer katana hodi amiasa ba lezadu.

## **2. Krime violasaun seksuál**

Nu prosesu	: 0003/20.MFFBL
Kompozisaun tribunál	: Koletivu
Juis	: Dr. Samuel da Costa Pacheco, Dr. Benjamin Barros no Dra. Patricia de Araujo Fatima Barreto Magno Xavier
Prokuradór	: Dr. Gostavo da Silva
Defeza	: Dr. Domingos dos Santos
Desizaun	: Pena prizaun tinan 2 suspende ba tinan 3.

Iha 06 Maiu 2022, Tribunál Distritál Suai prezide julgamentu leitura akordaun ba krime violasaun seksuál envolve arguidu JF hasoru lezada DS, iha Munisípiu Manufahe.

## **Akuzasaun prokuradór**

Prokuradór akuza katak iha 16 Jullu 2020, iha oras tuku 12:00 madrugada, lezada sente hamrok sai ba hemu bee iha dapur, derepente arguidu ho kondisaun lanu husi kuartu mai hakuak no taka lezada niaibun, hafoin ne'e arguidu lori lezada tama ba iha kuartu laran no dudu lezada ba iha kama leten no lori sumasu taka lezada nia oin. Arguidu hasai tiha lezada nia rounpa no halo relasaun seksuál ho lezada to'o ejakula. Lezada koko hakilar maibé labele tanba arguidu lori sumasu taka metin lezada nia oin.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 to'o tinan 15.

## **Produsaun ba prova sira**

Iha prosesu julgamentu, arguidu deklara katak nia namora ho lezada iha fulan marsu 2022, arguidu halo relasaun seksuál ho lezada ba kazu ida ne'e hamutuk ba dala hitu ona no sira halo relasaun seksuál ne'e ho konsentimentu, la obriga no la amesa lezada.

Arguidu deklara katak iha kalan akontesimentu ne'e arguidu ba hemu tua ho nia kolega sira no baibhira sente lanu todan no nia deside ba toba iha lezada sira nia uma no iha oras tuku 10:00 kalan lezada ba fanu arguidu iha kuartu no hateten ba arguidu katak nia ulun moras no haruka

arguidu muda oituan no toba ho arguidu iha kuartu arguidu toba ba ne'e, hafoin arguidu ho lezada rein malu no halo relasaun seksuál, arguidu deklara katak halo relasaun seksuál ne'e la obriga lezada no lataka sumasu ba lezada nia oin. Arguidu deklara tan katak depoisde akontesimentu arguidu ho lezada ba apresenta iha lezada nia inan- aman, maibé lezada nia inan-aman la simu arguidu no sira mai keixa fali arguidu.

Alende ne'e, lezada kontinua konfirma faktu sira iha akuzasaun, lezada deklara katak namora duni ho arguidu no gosta arguidu no hadomi arguidu. Lezada deklara liu tan katak halo relasaun seksuál ne'e dala ida de'it la'os dala hitu hanesan arguidu nia deklarasaun, lezada rejeita katak nunca ho arguidu ba apresenta-an iha nia inan-aman rasik dehan atu hola malu. Lezada haktuir katak liu tiha fulan ida mak foin atu rejolve problema ne'e maibé derepente husi uma Mahon mai lori lezada no polísia kaer arguidu nune'e la konsege resolve problema ne'e. Lezada haktuir katak la'os lezada mak ba keixa arguidu iha polísia.

Depoisde rona arguidu ho lezada nia deklarasaun, tribunál duvida ba arguidu ho lezada nia deklarasaun kona-ba arguidu dehan halo relasaun seksuál dala hitu no lezada nia deklarasaun dala ida, nune'e tribunál halo akareasaun no iha prosesu akareasaun ne'e arguidu ho lezada mantein ida-idak ninia deklarasaun.

Testemuña JG, hanesan lezada nia maun, depoimenta katak nia la iha kuñesimentu kona-ba akontesementu ne'e, maibé liu tiha fulan ida mak foin rona arguidu konta lezada hanesan fetu aat. Testemuña depoimenta katak la'os testemuña mak keixa arguidu.

### **Alegasaun finál**

Prokuradór haktuir katak iha julgamentu arguidu deklara katak halo relasaun seksuál ho lezada hamutuk dala hitu, relasaun seksuál ne'e nunca ameasa lezada maibé hakarak ho hakarak, alende ne'e lezada konfirma katak sira halo relasaun seksuál ne'e arguidu la ameasa lezada maibé dada lezada tama kuartu laran no halo tiha relasaun seksuál hotu, tanba arguidu iha momentu ne'e ho kondisaun lanu no matan dukur toba liu no lezada hader hatais nia roupa ba fali ninia kuartu. Prokuradór konsiderakatak arguidu nia hahalok ne'e la priense krime violasaun seksuál, tanba ne'e prokuradór husu ba tribunál atu halo altersaun kualifikasaun violasaun seksuál ba fali aktu seksuál adolexente tanba momentu halo relasaun seksuál ne'e lezada foin mak idade tinan 14. Nune'e husu ba tribunál atu kondena arguidu ho pena suspensaun.

Enkuantu defeza haktuir katak iha julgamentu arguidu deklara katak halo relasaun seksuál hasoru lezada, maibé iha violasaun seksuál ne'e halo kedas iha lezada sira nia uma no lezada nunca hakilar hodi husu ajuda, ho razaun hirak ne'e defeza husu ba tribunál atu absolve arguidu.

Kona-ba prokuradór nia pedidu alterasaun ne'e, defeza mantein akuzasaun no tribunál decide atu iha deliberasaun mak foin apresia.

### **Desizaun**

Depoisde avalia faktu sira hotu, tribunál koletivu konkorda pedidu husi prokuradór nian kona-ba alterasaun kualifikasaun jurídika. Tribunál prova katak arguidu halo relasaun seksuál ho lezada ne'ebé lezada nia idade foin atinji tinan 14. Bazeia ba faktu provadu no tetu mós sirkunstansia atenuante hanesan arguidu foin primeiravéz mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan rua suspende ba tinan tolu.

### **3. Danu Simples**

Nú. Prosesu

: 0077/21. PDSUA

Kompozisaun tribunál : Singula  
Juiz : Dr. Samuel da Costa Pacheco  
Prokuradór : Dr. Rafael Jeronimo Gusmão  
Defeza : Dr. Domingos do Santos  
Desizaun : Omologa pedidu dezistencia keixa

Iha 06 Maiu 2022, Tribunál Distritál Suai prezide julgamentu tentativa konsiliaun ba krime danu simples, envolve arguidu Abel de Araújo hasoru lezadu João de Araújo nu'udar nia alin rasik, iha Munisipiu Covalima.

### **Akuzasaun**

Prokuradór akuza katak iha 27 Juñu 2021, haleu oras tuku 19:00 kalan, arguidu ba iha lezadu nia uma hodi halo estragus fondasi uma lezadu nian. Tanba arguidu konsidera katak lezadu halo ninia fondasi uma tama liu ba iha ninia rai.

Prokuradór akuza arguidu kontra artigu 258 KP kona-ba danu simples ho moldura penál tinan 3 ka multa.

### **Produsaun ba prova sira**

Bazeia ba artigu 262 nú.1 KPP kona-ba tentativa konsiliaun, nune'e antes tama ba julgamentu produsaun ba prova, juis husu halo tentativa konsiliaun ba lezadu ho arguidu.

Iha prosesu tentativa konsiliaun ne'e, lezadu deklara katak hakarak dame malu ho arguidu sein kondisaun ruma, tanba lezadu ho arguidu nu'udar maun-alin rasik. Alende ne'e, arguidu mós deklara konkorda hakarak dame malu ho lezadu. Nune'e lezadu husu ba tribunál atu deziste hikas nia keixa hasoru arguidu.

### **Alegasaun finál**

Prokuradór ho defeza apresia akordu dame malu ne'ebé parte rua deside ona no husu ba tribunál atu omologa prosesu ne'e.

### **Desizaun**

Bazeia ba akordu dame husi parte rua no pedidu dezistencia keixa husi lezada. Nune'e tribunál konklui prosesu ne'e no omologa kedas akordu pedidu dezistencia keixa no absolve arguidu husi krime.

## **4. Ofensa ba Integridade Física Simples**

Nú. Prosesu : 0014/21. ANHTU  
Kompozisaun tribunál : Singulár  
Juiz : Dr. Samuel da Costa Pacheco  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Omologa pedidu dezistencia keixa

Iha 06 Maiu 2022, Tribunál Distritál Suai prezide julgamentu tentativa konsiliaun ba krime ofensa ba integridade física simples ne'ebé envolve arguidu Januario de Araújo, Ruben Gonzaga Magno, Lorenzo Ximenes no Herman Magno hasoru lezadu Joki da Costa Cina, iha Munisipiu Ainaro.

### **Akuzasaun prokuradór**

Prokuradór akuza katak iha 02 Dezembru 2021, hafoin lezadu hatun tiha nia kolega Ajai iha aldeia Ailora, lezadu deside fila ba uma maibe to'o iha aldeia Dausur, suku Leolima , arguidu Ruben Gonjaga Magno, Januario, Lorenzo no Herman hein iha dalan hodi halo agresauñ fíziku hasoru lezadu.

Arguidu Ruben tuku dala ida iha lezadu nia oin, arguidu sira seluk, arguidu Magno, Januario, Lorenzo no Herman baku lisuk lezadu iha kotuk laran no arguidu Lorenzo maka lori ai-kabuar naruk ida baku dala ida iha lezadu nia kotuk laran.

Prokuradór akuza arguidu sira kontra artigu 145 KP kona-ba ofensa ba integridade fízika simples ho moldura penal tinan 3 ka multa.

### **Produsaun ba prova sira**

Bazeia ba artigu 262 nú.1 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu halo tentativa konsiliaun ba lezadu ho arguidu sira.

Iha prosesu tentativa konsiliaun ne'e, lezadu hakarak dame malu ho arguidu sira ho kondisaun arguidu sira la bele halo tan hahalok hanesan iha futuru. Alende ne'e arguidu sira mós deklara katak konkorda ho pedidu lezadu no hakarak dame malu no arguidu sira mós promete sei la repete hahalok hanesan iha futuru hasoru lezadu. Nune'e lezadu husu ba tribunál atu deziste hikas nia keixa hasoru arguidu sira.

### **Alegasaun finál**

Prokuradór ho defeza apresia akordu dame malu ne'ebé parte rua deside ona no husu ba tribunál atu omologa prosesu ne'e.

### **Desizaun**

Bazeia ba akordu dame husi parte rua no pedidu dezisténsia keixa husi lezadu. Nune'e bazeia ba artigu 262 KPP, tribunál konklui prosesu ne'e no omologa akordu pedidu dezisténsia keixa ho kondisaun katak arguidu sira la bele repete tan hahalok ne'e iha futuru, nune'e tribunál konklui prosesu ne'e no absolve arguidu sira.

## **5. Krime ofensa ba integridade fízika simples ho natureza violénsia doméstika**

Nú prosesu : 0008/21.CVMCT  
Kompozisaun Tribunál : Singulár  
Juis : Dr. Samuel da Costa Pacheco  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Pena prizaun fulan 3 suspende ba tinan 1

Iha 06 Maiu 2022, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika envolve arguidu JCM hasoru nia feen CC, iha Munisípiu Covalima.

### **Akuzasaun prokuradór**

Prokuradór akuza katak iha 17 Setembru 2021, iha oras tuku 20:00 kalan, arguidu tuku dala ida iha lezada nia ren-toos. Antes ne'e arguidu toba hela maibé lezada ba fanu arguidu, halo arguidu hafodak, arguidu hadeer hirus no komete krime ne'e hasoru lezada.

Prokuradór akuza arguidu kontra artigu 145 KP kona-ba ofensa integridade fízika simples ho moldura penál tinan 3 ka multa konjuga ho artigu 2 (a), 3 (b), 35 (b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklara katak arguidu iha ona antesidente kriminais, arguidu deklara katak arrepende nia hahalok.

Alende ne'e lezada continua konfirma akuzasaun no deklara katak depoisde akontesimentu to'o agora arguidu labaku ona lezada, perdua ona arguidu, no hela hamutuk nafatin hanesan feen-laen.

### **Alegasaun final**

Prokurador konsidera arguidu komete krime ofensa integridade fizika simples ho natureza violensia domestika hasoru lezada ne'ebé arguidu konfesa no konfirma husi lezada, nune'e husu ba tribunál atu kondena arguidu tuir artigu 145 KP.

Enkuantu defeza husu ba tribunál atu kondena arguidu tuir konfiksaun tribunál nian.

### **Desizaun**

Depoisde avalia faktu hotu, tribunál prova arguidu komete krime ofensa ba integridade fizika simples forma violensia domestika hasoru nia feen lezada. Bazeia ba faktu provdu ne'e no tetu mós sirkuntansia atenuante hanesan arguidu arrepende ba ninia hahalok, nune'e konklui prosesu no kondena arguidu ho pena prizaun fulan tolu suspende ba tinan ida.

### **6. Krime ofensa ba integridade fizika simples ho natureza violensia domestika**

Nú prosesu : 0092/21.CVMCT  
Kompozisaun Tribunál : Singulár  
Juis : Dr. Samuel da Costa Pacheco  
Prokurador : Dr. Rafael Jeronimo Gusmão  
Defeza : Dr. Domingos dos Santos  
Desizaun : Pena prizaun fulan 6 suspende ba tinan 1

Iha 06 Maiu 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violensia domestika envolve arguidu JG hasoru nia feen, iha Munisípiu Covalima.

### **Akuzasaun prokurador**

Prokurador akuza katak iha 15 Juñu 2021, iha oras tuku 21:00 kalan, arguidu tuku dala tolu iha lezada nia ren-toos no basa dala tolu iha hasan parte karuk. Antes agreasaun hirak ne'e lezada ba festa kazamentu la fó hatene arguidu, nune'e arguidu nerboju no halo agreasaun hirak ne'e hasoru lezada.

Prokurador akuza arguidu konkursu krime 2 kontra artigu 145 KP kona-ba ofensa integridade fizika simples ho moldura penál tinan 3 ka multa, konjuga artigu 2 (a) 3, (b), 35 (b) no 36 LKVD.

### **Produsaun ba prova sira**

Iha prosesu julgamentu arguidu konfesa faktu hotu iha akuzasaun no deklara katak momentu lezada ba festa la fó hatene arguidu no arguidu nerboju tuku no basa duni lezada, arguidu arrepende ninia hahalok, depoisde akontesimentu arguidu la baku ona lezada to'o ohin loron.

Alende ne'e lezada continua konfirma faktu hotu iha akuzasaun, reforsa arguidu nia deklarasaun katak depoisde akontesimentu arguidu husu ona deskulpa no to'o agora arguidu labaku ona lezada no perdua ona arguidu.



## **Alegasaun finál**

Prokuradór haktuir katak, arguidu provadu komete krime hasoru lezada hanesan iha akuzasaun, arguidu rasik konfesa no reforsa husi lezada, prokuradór haree katak kazu laen baku feen aas tebes tanba ne'e atu halo prevensaun ba kuzu ne'e, husu ba tribunál atu kondena arguidu ho pena suspensaun tinan ida.

Entretantu defeza haktuir katak, iha julgamentu arguidu konfesa, arrepende no depoisde akontesimentu arguidu la baku ona lezada to'o ohin loron, defeza konsidera katak krime ne'e akontesetanba lezada ba festa la fó hatene arguidu hanesan xefe família. Tanba ne'e arguidu nerboju no halo agresaun hasoru lezada, ho nune'e husu ba tribunál atu kondena arguidu d tuir tribunál nia konfiksaun.

## **Desizaun**

Depoisde avalia faktu hotu, tribunál prova katak arguidu tuku dala tolu iha lezada nia ren-toos no basa dala tolu iha hasan parte karuk. Bazeia ba faktu provadu hirak ne'e tetu mós sirkunstansia atenuante hanesan arguidu foin primeiravés mai hatan iha tribunál, arrepende ninia hahalok no depoisde akontesimentu la komete ona krime foun, maske nune'e tribunál haree katak kazu violénesia doméstika aas tebes no arguidu ho lezada nafatin hela hamutuk nune'e atu prevene krime ne'e atu la akontese iha futuru, tribunál konklui prosesu ne'e no kondena arguidu ho pena prizaun fulan neen suspende ba tinan ida.

### **7. Ofensa ba Integridade Fízika Simples**

Nú. Prosesu : 0007/21. BBMLV  
Kompozisaun tribunál : Singular  
Juiz : Dr. Samuel da Costa Pacheco  
Prokuradór : Dr. Rafael Jerónimo Gusmão  
Defeza : Dr. Domingos dos Santos  
Desizaun : Omologa pedidu dezisténsia keixa

Iha 09 Maiu 2022, Tribunál Distritál Suai prezide julgamentu tentativa konsiliaisaun ba krime Ofensa ba Integridade Fízika Simples ne'ebé envolve arguidu Santiago Soares Dasi, Reinaldo Mawar, Denizio Pereira Bertalo, António Soares, Lazaro Soares ho Norberto Carlito hasoru lezadu Jaimito Soares Dasi, iha Munisipiu Bobonaru.

### **Akuzasaun prokuradór**

Prokuradór akuza katak iha 18 Janeiru 2021, iha oras tuku 21:00 kalan, iha dalan klaran parte Natariau arguidu Santiago hakilar tuir lezadu sira katak '*imi hamri'ik lai*' no lezadu ho testemuña Nelson mós hamri'ik no arguidu Santiago ko'alia ba lezadu dehan "*Ó mak gen ne'e ka?*" hafoin arguidu tuku kedas dala ida iha lezadu nia matan parte karuk halo lezadu monu tun ba rai.

Depoisde ida ne'e arguidu sira, hanesan arguidu Reinaldo Mawar, Denizio Pereira Bertalo, António Soares no Lazaro Soares ne'ebé taka oin metin mai hodi baku lisuk lezadu no arguidu sira balun kaer katana no balun ka'er ai, no arguidu sira ne'e nain ida atu taa lezadu maka testemuña Nelson Orlando maka baku monu tiha katana refere no arguidu Santiago lori ai-bubur ida baku iha lezadu nia kotuk laran.

Prokuradó akuza arguidu sira kontra artigu 145 KP kona-ba ofensa ba integridade fízika simples ho moldura penál tinan 3 ka multa.

### **Produsaun ba prova sira**

Bazeia ba artigu 262 nú.1 KPP kona-ba tentativa konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu sira ho lezadu.

Iha prosesu tentativa konsiliaun ne'e, lezadu deklara hakarak deziste nia keixa hasoru arguidu sira sein kondisaun ruma, tanba antes ne'e lezadu ho arguidu sira di'ak malu ona. Alende ne'e arguidu sira mós deklara konkorda ho pedidu lezadu nian no hakarak dame malu ho lezadu. Tanba ne'e, lezadu husu ba tribunál atu deziste nia keixa hasoru arguidu sira.

### **Alegasaun finál**

Prokuradór no defeza konkorda ho parte rua nia akordu dame malu ne'e, no husu ba tribunál atu omologa prosesu ne'e.

### **Desizaun**

Bazeia ba akordu dame malu husi parte rua no pedidu dexistencia keixa husi lezadu sira ne'ebé antes ne'e sira dame malu ona, nune'e tribunál konklui hodi omologa akordu dame malu no absolve arguidu sira.

### **8. Ofensa ba Integridade Fízika Simples ho Natureza Violensia Doméstika**

Nú. Prosesu	: 0006/20. ANHTB
Kompozisaun tribunal	: Singular
Juiz	: Dra. Patricia de Araújo Fatima Bareto Magno Xavier
Prokurador	: Dr. Rafael Jeronimo Gusmão
Defeza	: Dr. Albino de Jesus Pereira
Desizaun	: Pena prizaun tinan 1 suspende nia ezekusaun tinan 1 fulan 6.

Iha 10 Maiu 2022, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MdA hasoru arguidu nia eis-feen, iha munisipiu Ainaro.

### **Akuzasaun prokuradór**

Prokuradór akuza katak iha 23 Jullu 2020, iha oras tuku 20:00 kalan, arguidu basa dala ida iha lezada nia hasan parte karuk no buti dala ida iha lezada nia kakorok. Arguidu nia hahalok ne'e halo lezada sofre moras iha hasan no kakorok. Depois arguidu ho lezada hadau malu *tanbungan* osan nian no arguidu foti martelu atu baku rahun *tanbungan* osan nian mak martelo kona fali lezada nia ren-toos moras no kanek ki'ik. Antes agreasaun hirak ne'e lezada haruka sira nia oan bolu arguidu atu han kalan maibé arguidu hasai liafuan aat no tolok lezada, lezada mós hatan '*se ó lakohi han hau ba hela fali iha toos, imi iha ne'e halo uma lisan ba*. Argudu ho lezada diskuti malu, arguidu nerboju no komete krime hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (b), 35 (b) no 36 LKVD.

### **Produsaun ba prova sira**

Iha prosesu julgamentu arguidu nega faktu balun iha akuzasaun no deklara katak iha 23 Jullu 2020, iha tuku 20:00 kalan diskute malu tanba de'it arguidu lori lampu foun leno ba lezada nia matan laran, arguidu deklara tan katak lezada iha kuartu laran foti sai *tanbungan* osan nian, nune'e arguidu ho lezadu hadau malu *tanbungan* osan nian ne'e no lezada soke padere mak nia ulun kanek, la'os arguidu mak baku ho martelo. Arguidu deklara liu tan katak depoisde akontesimentu lezada ba hela ketak ona no to'o agora seidauk resolve sira nia problema ne'e.

Alende ne'e lezada kontinua konfirma faktu sira iha akuzasaun no deklarata katak depoisde akontesimentu lezada ba hela ketak ona no sira nain rua seidak di'ak malu to'o agora.

### **Alegasaun final**

Prokurador haktuir katak mezmu arguidu konfesa parsialmente faktu sira iha akuzasaun maibe lezada kontinua konfirma faktu sira iha akuzasaun no prova *fotografia* ne'ebé mak junta iha autos. Prokurador konsidera arguidu provadu komete krime ofensa ba integridade fizika simples ho natureza violensia domestik, nune'e husu ba tribunál atu kondena arguidu ho pena suspensaun.

Entretantu defeza mos haktuir katak iha produsan ba prova rona hotu tiha arguidu no lezada nia deklarasaun, nune'e husu ba tribunál tetu mos sirkunstansia atenuante sira hanesan arguidu foin primeiravez mai hatan iha tribunál, ho nune'e husu atu aplika tuir konviksaun tribunál nian.

### **Desizaun**

Depoisde avalia faktu sira hotu, tribunál prova katak arguidu basa dala ida iha lezada nia hasan parte karuk, buti iha lezada nia kakoro no arguidu atu baku rahun tanbungan osan nian nune'e martelo kona fali lezada nia rentos ne'ebé fotografia junta iha autos.tribunál mos indentifika iha sistema katak arguidu antes ne'e komete ona kazu ne'ebé hanesan. Bazeia ba faktu provadu ne'e no tetu mos sirkuntansia agravante katak arguidu nunka arrepende, nune'e tribunál konklui prosesu no kondena arguidu pena prizaun tinan ida suspende ba tinan ida fulan neen.

### **9. Krime koasaun seksuál**

Nu prosesu : 0005/21.BBATB  
Kompozisaun tribunal : Koletvu  
Juis : Dr. Samuel da Costa Paseco, Dr. Benjamin Barros no  
Dra. Patricia de Araujo F. B. M. Xavier  
Prokurador : Dr. Rafael Jeronimo Gusmão  
Defeza : Dr. Domingos dos Santos  
Desizaun : Absolve

Iha 11 Maiu 2022, Tribunál Distritál Suai preside julgamentu leitura akordaun ba krime koasaun seksuál envolve arguidu NB hasoru lezada MJRR, iha Munisípiu Bobonaro.

### **Akuzasaun prokurador**

Prokurador akuza katak iha 17 Juñu 2021, iha oras tuku 8:00 dadersan, arguidu ba iha lezada nia uma no bolu lezada nia la'en dala tolu tutuir malu, maibe lezada hatan katak nusá no arguidu hatan dehan atu karega telefone, lezada mos haruka arguidu karega telefone iha meza leten. Derepente arguidu tama ba lezada nia kuartu no arguidu nia rupa hatun ona to'o iha ain tur, halo lezada hakfodak no lezada tauk kous nia oan atu halai sai, maibe arguidu kaer metin lezada nia liman no rasta lezada ba iha kama leten no arguidu kontinua buti lezada nia kanuruk no halo lezada hakilar ladi'ak. Arguidu rasta lezada nia liman hodi kaer arguidu nia orgaun seksuál. Tuir mai lezada nia la'en fila husi toos tama ba kuartu laran haree lezada kaer hela arguidu nia orgaun seksuál, no lezada nia la'en tuku kedas dala tolu iha arguidu nia hasan parte karuk no arguidu halai sai husi kuartu ba fali ninia uma. Depoisde akontesimentu familia rua tur hamutuk resolve tuir lisan kemak nian no arguidu tenke fó sala karau rua belak rua ba lezada.

Prokurador akuza arguidu kontra artigu 171 KP kona-ba koasaun seksuál ho moldura penál tinan 2 to'o tinan 8.

### **Produsaun ba prova sira**

Iha prosesu julgamentu, arguidu deklara katak faktu balun loos no balun la loos, arguidu deklara katak momentu lori telefone ba karega iha lezada nia uma, arguidu la obriga lezada atu kaer arguidu nia orgaun seksuál, maibé ho konsentimentu, arguidu mós deklara katak antes problema ne'e arguidu ho lezada halo relasaun seksuál dala ida ona iha lezada nia uma kotuk.

Alende ne'e lezada kontinua konfirma faktu iha akuzasaun no deklara katak momentu akontesimentu ne'e arguidu buti lezada nia kanuruk, lezada sente trauma nune'e lezada hakilar sai ladi'ak, lezada haktuir katak durante ne'e nunca halo relasaun seksuál arguidu lezadakuineese arguidu hanesan ninia banin feto nia oan sarani, lezada deklara liu tan katak momentu ne'e resolve tuir família no sirakonkorda ona hodi rezolve problema liuhusi fó sala ba malu maibé derepente polísia mai ka'er ona arguidu nune'e to'o agora seidauk fó sala malu hodi rezolve problema ne'e.

Tribunál koletivu duvida ba deklrasaun arguidu nia katak antes ne'e ho lezada halo ona relasaun seksuál no lezada dehan nunca halo relasaun seksuál ho lezada nune'e tribunál husu atu halo akareasaun. Iha prosesu akareasaun arguidu ho lezada mantein ida-idak ninia deklarasaun.

Testemuña Filipe Fontes, hanesan lezada nia la'en depoimenta katak momentu akontese testemuña fila husi to'os, atu tula lezada ba hotu to'os, maibé banhira to'o iha uma testemuna rona nia oan tanis iha kuartu laran no testemuña tama ba kuartu atu kous ninia oan no haree lezada kaer hela arguidu nia orgaun seksuál no arguidu dudu tun lezada nia kanuruk ne'ebé ho kondisaun triste no tanis. Testemuña mós depoimenta katak, testemuña tuku dala tolu iha arguidu nia hasan parte karuk no arguidu halai sai husi uma, testemuña depoimenta liu tan katak depoisde akontesimentu família rua tuur hamutuk hodi resolve no arguidu atu fó sala karau rua no belak rua maibé lakonsege fó sala tanba prosesu ne'e la'o ba oin ona.

### **Alegasaun finál**

Prokuradór haktuir katak, arguidu komete krime koasaun seksuál hasoru lezada, iha julgamentu arguidu konfesa parsialmente, maibé lezada konfirma no reforsa husi testamuña katak momentu ne'eba testamuña tama ba kuartu laran haree ninia oan tanis no haree lezada triste no tanis hela, tanba ne'e husu ba tribunál atu kondena arguidu ho pena prizaun tinan rua suspende ba tinan lima.

Entretantu defeza haktuir katak, iha julgamentu arguidu konfesa faktu maibé ho konsentimentu, arguidu mós deklara katak moris hamutuk hanesan feen-laen ho lezada dala ida iha lezada sira nia uma no arguidu la ameasa lezada no lezada mós ho konsentimentu halo relasaun seksuál ne'e, tanba ne'e defeza husu ba tribunál atu absolve arguidu.

### **Desizaun**

Depoisde avalia faktu hotu, tribunál konsidera faktu sira iha akuzasaun la provadu, iha julgamentu arguidu deklara katak antes ne'e nia halo relasaun seksuál dala ida ona ho lezada no ba kazu ne'e tribunál intende katak arguidu la obriga lezada tanba akontesimentu ne'e lezada lahakilar ho razaun hirak ne'e tribunál konklui prosesu ne'e no absolve arguidu.

### **10. Krime Ezibisionismu Seksuál**

Nú. prosesu	: 0010/17. MFSIC
Kompozisaun tribunál	: Singulár
Juiz	: Dr. Benjamin Barros
Prokuradór	: Dr. Gustavo da Silva
Defeza	: Dr. Manuel Amaral

Desizaun : Omologa pedidu dezisténsia keixa

Iha 16 Maiu 2022, Tribunál Distrital Suai prezide julgamentu tentativa konsiliaun ba krime ezibisionismu seksuál ne'ebé envolve arguidu ENP hasoru nia oan enteada lezada JSdJ, iha munisipiu Manufahe.

### **Akuzasaun Prokuradór**

Prokuradór akuza katak iha 10 Maiu 2017, iha oras tuku 09:05 dadeer, lezada foti bikan foer iha sala han nian derepente arguidu sai husi haris-fatin la'ó molik de'it no lezada haree,hafoin arguidu haruka lezada atu kaer arguidu nia orgaun seksuál, lezada lakohi maibé arguidu kontinua obriga lezada . Lezada kontinua reziste no halai sai husi uma laran no ba subar iha viziñu nia uma.

Prokuradór akuza arguidu kontra artigu 181KP kona-ba ezibisionismu seksuál ho moldura penál tinan 3 ka multa.

### **Produsaun ba prova sira**

Bazeia ba artigu 262 nú.1 KPP, kona-ba tentativa konsiliaun, nune'e antes tama ba julgamentu produsaun ba provas, juis husu atu halo tentativa konsiliaun ba lezada ho arguidu.

Iha prosesu tentativa konsiliaun ne'e, lezada hakarak dame malu ho arguidu, tanba antes ne'e arguidu ho lezada dame malu ona no arguidu fó osan USD. 200.00 \$ ba lezada hodi foti fali lezada nia dignidade. Alende ne'e arguidu mós konkorda ho pedidu lezada nian,arrepente nia hahalok no promete sei la halo tan hahalok hanesan ba lezada no ba feto sira seluk iha futuro. Nune'e lezada husu ba tribunál atu deziste ninia keixa hasoru arguidu.

### **Alegasaun finál**

Prokuradór ho defeza apresia akordu dame malu ne'ebé parte nain rua decide ona no husu ba tribunál atu omologa prosesu ida ne'e.

### **Desizaun**

Bazeia ba artigu 262 nú.2 KPP no akordu dame malu husi parte rua no pedidu dezisténsia keixa husi lezada Nune'e tribunál omologa akordu dame ne'e no absolve arguidu husi prosesu.

### **11. Krime abuzu seksuál ba menór no Devasa**

Nuc. Prosesu : 0003/21. CVFHR  
Kompozisaun tribunál : Koletivu  
Juis : Dra. Patricia de Araújo Fatima Barreto Magno Xavier no  
Dr. Samuel da Costa Pacheco, Dr. Benjamin Barros.  
Prokuradór : Dr. Rafael Jeronimo Gusmão  
Defeza : Dr. Albano Maia  
Desizaun : Pena prizaun tinan 6 no Pena multa US\$. 45,00.

Iha 17 Maiu 2022, Tribunál Distrital Suai prezide julgamentu leitura akordaun ba krime abuzu seksuál ba menór no devasa ne'ebé envolve arguidu AAdA hasoru nia eis-namorada lezada MMDdA (nu'udar eis namorada) ho idade menus husi tinan 13, iha Munisípiu Covalima.

### **Akuzasaun prokuradór**

Prokuradór akuza katak iha 25 Novembru 2020 iha oras tuku 15:00 lokraik, arguidu lori lezada tama ba iha edifisiu tuan Polisia Fohorem no arguidu hasai lezada nia roupa, depois arguidu mós hasai ninia roupa no ho obrigatoriu halo relasaun seksuál ho lezada to'o ejakula.

Depoisde halo relsaun seksuál arguidu ameasa lezada dehan "*labele hateten ba famiía se ó hateten aba fha'u oho ó*", arguidu mós lori nia telefone hasai lezada nia fotografia ho kondisaun la uza roupa.

Depoisde ida ne'e iha 26 Abril 2021, arguidu manda fali lezada nia foto ne'ebé la uza roupa ne'e ba lezada nia subriña Lda liuhosi *Whatsapp* no publika iha media sosi'al *acebook*, tanba arguidu rona informasaun katak lezada iha ona namoradu foun.

Prokuradór akuza arguidu kontra artigu 177 KP kona-ba abuzu seksuál ba menór ho moldura penál tinan 5 to'o tinan 20 no 183 KP kona-ba devasa ho moldura penál tinan 1 ka multa.

### **Produsaun ba prova sira**

Iha prosesu julgamentu arguidu konfesa parsialmente ba faktu sira iha akuzasaun no deklarata katak iha 25 Novembru 2020 arguidu telefone lezada no sira nain rua hasoru malu hafoin arguidu lori lezada tama ba iha edifisiu tuan Polisia Fohorem nian. Arguidu husu ba lezada atu sira halo relasaun seksuál no lezada mós hatan, arguidu holezada mós hasai sira nia roupa no sira halo relasaun seksuál to'o ejakula. Arguidu deklarata katak depois halo relasaun seksuál arguidu hasai lezada nia *fotografia* ho kondisaun lezada la uza roupa, razaun hasai lezada nia foto molik atu iha futuru lezada labele namora fali ho mane seluk se bainhira lezada namora fali mane seluk arguidu sei publika lezada nia foto ne'e iha media sosiál. Arguidu deklarata liu tan katak iha 26 Abril 2021 arguidu haruka lezada ninia fotografia molik ne'e ba lezada nia subriña Lda husi *Whatsapp*, maibé arguidu rejeita la publika lezada nia *fotografia* ne'e iha media sosial.

Alende ne'e lezada kontinua konfirma faktu sira hotu iha akuzasaun no deklarata katak iha loron akontesimentu lezada foin halo tinan 13.

### **Alegasaun finál**

Prokuradór konsidera arguidu provadu komete krime abuzu seksuál ba menór no devasa hasoru lezada bazeia ba arguidu nia deklarasaun no lezada nia konfirmasaun no mós komprovadu ho lezada nia sertidaun batismu ne'ebé iha momentu akontesimentu lezada sei ho idade menus husi tinan 13. Tanba ne'e husu ba tribunál atu kondena arguidu ho pena prizaun tinan 8 ba krime abuzu seksuál ba menór no pena multa ba krime devasa.

Entretantu defeza husu ba tribunál atu aplika pena suspensaun tanba arguidu konfesa parsialmente ba faktus sira, arguidu mós deklarata nia sei hadomi lezada, hakarak atu hamutuk ho lezada hanesan feen-la'en no arguidu foin mak primeiravés mai hatan iha tribunál.

### **Desizaun**

Depoisde avalia faktu sira hotu, tribunál prova katak arguidu halo duni relasaun seksuál ho lezada ne'ebé sei ho idade menus husi tinan 13 iha edifisiu tuan Polisia Fohorem nian. Tribunál mós prova arguiduhasai fotografia lezada nian ho kondisaun la uza roupa no manda ba lezada nia subriña.

Bazeia ba faktu provadu sira ne'e no tetu mós sirkunstansia atenuante sira hotu hanesan arguidu konfesa no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan 6 ba krime abuzu seksuál ba menór no pena multa ba krime devasa ho osan US\$.45.00. ne'ebé arguidu sei selu kada loron. 0,50 sentavus durante

loron 90. Tribunál mós aplika pena alternativa durante loron 60 kuandu arguidu la selu pena multa refere.

## **12. Dezobediénsia**

Nú. prosesu : 0024/21. BBBGD  
Kompozisaun tribunál : Singular  
Juiz : Dr. Samuel da Costa Pacheco  
Prokuradór : Dr. Rafael JerónimoGusmão  
Defeza : Dr. Domingos dos Santos  
Desizaun : pena prizaun fulan 3 suspende nia ezekusaun ba tinan 1

Iha 24 Maiu 2022, Tribunál Distritál Suai prezide julgamentu leitura sentensa ba krime dezobediénsia ne'ebé envolve arguidu Joanico Pereira no Ermelindo Martins hasoru estadu RDTL, iha Munisipiu Bobonaro.

### **Akuzasaun prokuradór**

Prokuradór akuza katak iha 05 Maiu 2021, oras la apura arguidu nain rua ba iha Atambua Indonézia hodi treinu PSHT iha Udin nia uma no hafoin hodi gradua iha 18 Agostu 2021 no iha 27 Agostu 2021 hodi ba entrega-án iha Polisia Indonézia no deporta arguidu nain rua mai Timor-Leste.

Prokuradór akuza arguidu nain rua kontra artigu 244 KP kona-ba dezobediénsia no konjuga ho (Dekretu Presidente da Republika nú.24/2021 de 28 de Abri).

### **Produsaun ba prova sira**

Iha prosesu julgamentu nia laran, arguidu Joanico Pereira ho Ermelindo Martins konfesa integralmente ba faktu sira iha akuzasaun.

### **Alegasaun finál**

Prokuradór, konsidera arguidu Joanico Pereira ho Ermelindo Martins provadu komete krime dezobediénsia bazeia ba arguidu nian rua nia deklarasaun ne'ebé konfesa integralmente ba faktu iha akuzasaun, tanba ne'e husu ba tribunál atu kondena arguidu nain rua tuir artigu ne'ebé iha akuzasaun.

Entretantu, defeza husu ba tribunál atu kondena arguidu nain rua ho pena multa tanba arguidu nain rua konfesa integralmente ba faktu sira iha akuzasaun no sira foin mak primeiravéz mai hatan iha tribunál.

### **Desizaun**

Depoisde avalia faktu hotu, tribunál prova katak arguidu/a nain rua komete krime dezobidensia. Bazeia ba faktu provadu hirak ne'e tetu sirkuntansia atenuante hanesan arguidu/a foin primeiravéz mai hatan iha tribunál, maibé tribunál mós tetu sirkuntansia agravante hanesan momentu ne'ebá estadu Timor-Lesta iha hela estadu emrjensia maibé arguidu sira tama mai area Timor-Lesta la iha karta suap nune'e bele hadaet tan ba ema seluk. Nune'e tribunál konklui prosesu ne'e no kondena arguidu/a pena prizaun fulan tolu suspende ba tinan ida.

## **13. Krime Ofensa Ba Integridade Fízika Simples**

Nú. Prosesu : 0132/21.BBMLV  
Kompozisaun tribunál : Singulár  
Juis : Dr. Samuel da Costa Pacheco.  
Prokuradór : Dr. Gustavo da Silva.

Defeza : Dr. Domingos do santo  
Desizaun : Omologa dezisténsia keixa

Iha 26 Maiu 2022, Tribunál Distritál Suai prezide julgamentu tentativa konsiliaisaun ba krime ofensa ba integridade física simples ne'ebé envolve arguidu Nelson Vicenti Moniz ho Gergio Pinto Fernandes hasoru lezadu Ruben Caetano Longinhos, iha Munisípiu Maliana.

### **Akuzasaun Prokuradór**

Prokuradór akuza katak iha 15 Dezembru 2021, iha oras tuku 18:30 kalan arguidu Nelson Vicenti kaer ai ki'ik ida baku dala ida iha lezadu nia ulun no baku dala haat iha lezadu nia liman parte loos no parte karuk. Antes ne'e arguidu ho lezada iha problema kona-ba hadau malu rai.

Prokuradór akuza arguidu kontra artigu 145KP kona-ba ofensa ba integridade física simples ho moldura penál tinan 3 ka multa.

### **Produsaun ba prova sira**

Bazeia ba artigu 262 nú.1KPP kona-ba tentativa konsiliaisaun, nune'e antes tama ba julgamentu produsaun ba prova, juis husu atu halo tentativa konsiliaisaun ba lezadu ho arguidu nain rua.

Iha prosesu tentativa konsiliaisaun ne'e, lezadu hakarak dame malu ho arguidu nain rua ho kondisaun katak arguidu nain rua fó osan US\$120.00 ba lezadu, kada arguidu ida US\$60.00. Alende ne'e arguidu nain rua konkorda ho pedidu lezadu nian no hakarak fó osan US\$120.00 ba lezadu. Arguidu nain rua mós arrepende sira ninia hahalok no promete sei la halo tan hahalok hanesan hasoru lezadu. Nune'e lezadu husu ba tribunál atu deziste ninia keixa hasoru arguidu nain rua.

### **Alegasaun finál**

Prokuradór ho defeza apresia akordu dame malu ne'ebé parte rua deside ona no husu ba tribunál atu omologa prosesu ne'e.

### **Desizaun**

Bazeia ba artigu 262 nú 2 KPP no akordu dame malu husi parte rua no pedidu dezisténsia keixa husi lezadu , nune'e tribunál omologa akordu dame malu ida ne'e.

### **14. Kazu Sivíl regulasaun ba ezersísiu podér paternal**

Nú.Prosesu : 0088/18.CVTDS  
Kompozisaun Tribunál : Singulár  
Juis : Dr.Jose Maria de Araújo  
Prokuradór : Dr. Nelson J.S. Magno  
Defeza : Dr. Manuel Amaral  
Desizau : Omologa dezisténsia keixa

Iha 27 Maio 2022, Tribunál Distritál Suai liu husi julgamentu movel iha Munisípiu Bobonaro, prezide julgamentu tentativa konsiliaisaun ba kazu regulasaun ezersísiu podér paternal ne'ebé envolve autór Triburico Drogba Manukandala (idade tinan 12), hasoru rekeridu RMM no rekerida JS nu'udar autór nia inan-aman, iha Munisípiu Bobonaro.

### **Termu no fundamentu sira**

Menor Triburico Drogab Manukandala moris iha 15 Masru 2010, oan husi rekeridu Rogerio Manukandala Manuel ho Rekerida Joagina Santos. Durante menór nia inan-aman separa, rekerida maka sustenta menór. Rekeridu nunka fó alimentasaun ba menór. Rekeridu menór nia



aman serbisu hanesan funsionáriu publiku iha Ministériu Administrasaun Estatal ho vensimentu kada fulan US\$ 298.00 arguidu iha kbi'it atu sustenta menór. Tanba menór nia inan sei eskolah hela iha Universidade.

Kazu ne'e relaciona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

### **Tentativa konsiliaun**

Iha julgamentu tentativa konsiliaun ne'e, rekerida deklara katak menór agora dadaun hela ho rekerida no rekeridu nunca fó alimentasaun, nune'e rekerida husu atu rekeridu tenke fó alimentasaun ba menór kada fulan US\$50.00. Rekeridu konkorda atu fulan-fulan fó ba menór US\$50.00, osan refere sei transfer liu husi *Mosan Telemor* razaun tanba menór nia aman hela iha Dili no menór ho nia inan hela iha Maliana. Rekeridu sei komesa transfer osan ne'e ba menór komesa iha dia 25 Juñu 2022. Konkorda mós regra vizita kundu rekeridu hanesan aman bainhira halo viazen serbisu iha Maliana bele vizita menór.

### **Alegasaun final**

Prokuradór representa menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

### **Desizaun**

Bazeia ba parte rua nia akordu kona-ba alimentasaun, hela fatin no rejime vizita nian, Tribunál konklui prosesu ne'e no omologa akordu ne'e.

### **15. Kazu Sivíl regulasaun ba ezersísiu podér paternál**

Nú.Prosesu : 0073/21.CVTD  
Kompozisaun Tribunál : Singulár  
Juis : Dr. Jose Maria de Araújo  
Prokuradór : Dr. Nelson Jose Soares Magno  
Defeza : Dr. Manuel Amaral  
Desizau : Omologa dezisténsia keixa

Iha 27 Maiu 2022, Tribunál Distritál Suai liu husi julgamentu movel iha Munisípiu Bobonaro, preside julgamentu tentativa konsiliaun ba kazu regulasaun ezersísiu podér paternál ne'ebé envolve autór DB no JS (idade tinan 11 ho 14), hasoru rekeridu FdS no rekerida FM nu'udar autór nia inan-aman, iha Munisípio Bobonaro.

### **Termu no Fundamentu Sira**

Rekerida inan ho rekeridu aman antes ne'e moris hamutuk hanesan feen ho la'en husi moris hamutuk ne'e no sira iha oan nain 6, agora dadaun menór sira ne'e hela ho rekerida menór sira nia inan.

Durante rekerida ho rekeridu separa rekeridu nunca fó alimentasaun ba menór sira. Rekeridu hanesan veteranus hetan osan fulan-fulan US\$270.00. Rekerida inan serbisu hanesan funsinariu kontratadu iha Ministériu Edukasaun fulan fulan simu de'it osan US\$ 205.00 hare ba osan ne'e ki'ik liu nune'e rekerida hanesan menór nia inan hakarak rekeridu mós sutenta menór sira.

Kazu ne'e relaciona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

### **Tentativa konsiliaun**

Iha julgamentu tentativa konsiliaun ne'e, rekerida deklara ba tribunál katak menór agora dadaun hela ho rekerida no rekeridu nunka fó alimentasaun, nune'e rekerida husu atu rekeridu tenke fó alimentasaun ba menór kada fulan US\$60.00. Rekeridu konkorda atu fulan fulan fó ba menor US\$60 .00, osan refere sei transfer liu husi menór nia konta bankaria. Rekeridu komesa transfer osan ne'e ba menór komesa iha dia 28 Juñu 2022. Kona-ba regra Vizita rekeridu aman bele ba vizita menór sira kuandu feriadu eskolah depende ba komunikasaun. Hare ba menór durante ne'e hela ho rekerida nune'e aseita menór nafatin hela ho nia inan tanba rekeridu menór nia aman mós forma ona familia iha oan nain ida.

### **Alegasaun finál**

Prokuradór representa menór no defeza husu ba tribunál atu omoloa akordu ne'ebé rekeridu no rekerida konkorda hamutuk atu tau-matan ba menór.

### **Desizaun**

Bazeia ba parte rua nia akordu kona-ba alimentasaun, hela fatin no rejime vizita nian, Tribunál konklui prosesu ne'e no omologa akordu ne'e.

### **16. Krime ofensa ba integridade fizika simples**

Nú prosesu	: 0001/19.MFTRC
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Omologa no dezistencia keisa

Iha 27 Maiu 2022, Tribunál Distritál Suai prezide julgamentu tentativa konsiliaun ba kazu ofensa ba integridade fizika simples, arguidu/a Arcanjo Moreira no Paulina de Jesus hasoru lezada Fransisca Caldeira no Jacinta Fatima de Araujo, iha Manufahe.

### **Akuzasaun prokuradór**

Prokuradór akuza katak iha 20 Feveireu 2019, iha oras tuku 15:00 lokraik, arguidu no arguida tuku dala rua lezada Jacinta F de Araujo nia kotuk laran no rasta lezada nia fuuk riba ba rai no arguidu basa dala lima ihalezada Fransisca Caldeira nia hasan no buti dala ida lezada nia kakorok, arguidu ho arguida ninia atuasaun ne'e lezada nain rua hetan moras iha fatin atinjidu. Antes agrasaun hirak ne'e hasoru lezada nain rua, Sr. Silveiro halo arguida no arguidu nia oan Sra. Joana isin rua depois la responsabiliza no ba hola fali lezada nia oan feto Domingas, nune'e arguidu no arguida nerboju komete krime hirak ne'e hasoru lezada nain rua.

Prokuradór akuza arguidu kontra artigu 145 KP kona-ba ofensa ba integridade fizika simples moldura penál tinan 3 ka multa.

### **Produsaun ba prova sira**

Bazeia ba artigu 262 (1) Kódigu Prosesu Penál (KPP) kona-ba tentativa konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no arguida ho lezada sira.

Iha prosesu tentativa konsiliaun ne'e, lezada nain rua hakarak dame malu ho arguidu sira maibé ho kondisaun US\$ 100.00, no lezada nain rua husu atu arguidu no arguida atu la repete ninia hahalok hirak ne'e iha futuru. Alende ne'e, arguidu no arguida mós konkorda ho pedidu lezada sira nian no iha perante julgamentu fó kedan osan total US\$ 100.00 ba lezada nain rua.

Arguidu no arguida mós deklara katak arrepende nia hahalok no promete sei la repete tan hahalok hanesan iha futuru.

### **Alegasaun finál**

Prokuradór no defeza husu ba tribunál atu omologa akordu dame ne'ebé parte sira konkorda ona.

### **Desizaun**

Bazeia ba akordu dame husi parte rua no pedidu dezisténsia husi lezada sira, nune'e tribunál konklui prosesu ne'e no omologa pedidu dezisténsia keixa no absolve arguidu no arguida husi krime.

### **17. Krime ofensa ba integridade fizika simples ho natureza violénsia doméstika.**

Nú prosesu : 0050/21.CVSUI  
Kompozisaun tribunal : Singulár  
Juis : Dr. Samuel da Costa Pacheco  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Pena prizaun fulan 8 suspende ba tinan 1

Iha 30 Maiu 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika, envolve arguidu AF, hasoru nia oan fetu boot lezada DF, iha Munisípiu Covalima.

### **Akuzasaun prokuradór**

Prokuradór akuza katak iha 14 Juñu 2021, iha oras tuku 13:25 meudia, arguidu lori fiu baku dala barak iha lezada nia ain rua, dala barak iha liman rua, kotuk laran no baku iha inus. Kazu ne'e akontese tanba lezada husi Dili mai iha Suia hatama dokumentus ba vaga ida iha sentru saude Covalima no bainhira lezada hatama hotu dokumentus atu fila ba Dili, maibé arguidu bandu lezada no halimar iha Suia mak fila ba Dili, maibé lezada lakoi, nune'e arguidu nerboju no komete aktu hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, 3 (c), 35 (b) 36 LKVD.

### **Produsaun ba prova sira**

Iha julgamentu arguidu konfesa faktu hotu iha akuzasaun no deklara katak baku oan ne'e ladi'ak promete sei larepete ninia hahalok ne'e iha futuru, arguidu haktuir tan katak servisu hanesan agrikultor la iha rendimentu ne'ebé fiksi. Alende ne'e lezada kontinua konfirma faktu iha akuzasaun no deklara katak depoisde akontesimentu di'ak malu kedan, lezada deklara liu tan katak perdua arguidu ninia hahalok.

### **Alegasaun finál**

Prokuradór, konsidera arguidu provadu komete krime ofensa integridade fizika simples ho forma violensia domestika, ne'ebé arguidu konfesa no konfirma husi lezada, nune'e husu ba tribunál atu kondena arguidu pena prizaun fulan neen suspende ba tinan ida.

Entretantu defeza haktuir katak arguidu konfesa, arrepende ba ninia hahalok no promete sei larepete ninia hahalok, alende ne'e mós sira di'ak malu fali ona. nune'e husu ba tribunál atu kondena arguidu tuir konfiksaun tribunál nian.

**Desizaun**

Depoizde avalia faktu hotu, tribunál prova arguidu komete krime ofensa ba integridade fizika simples forma violénsia doméstika hasoru ninia oan fetu.

Bazeia ba faktu sira provadu ne'e no tetu mós sirkuntansia atenuante hanesan arguidu foin mak mai hatan iha tribunál, arrepende ba ninia hahalok no promete ona sei larepete ninia hahalok iha future, nune'e tribunál konklui prosesu no kondena arguidu pena prizaun fulan ualu suspende ba tinan ida.

Atu hetan informasaun liutan favór kontaktu:

Ana Paula Marçal  
Diretora Ezekutiva JSMP  
Telefone: 3323883/77040735  
Diresaun e-mail: [ana@jsmp.tl](mailto:ana@jsmp.tl)  
[info@jsmp.tl](mailto:info@jsmp.tl)  
Website: <http://jsmp.tl>